



SIARAN MEDIA

DERMA RM1 JUTA: BUKTI SEMANGAT MEMBERI DAN KEMURAHAN HARI RAKYAT MALAYSIA

Kementerian Perpaduan Negara melalui Yayasan Tunku Abdul Rahman (YTAR) ingin mengumumkan penubuhan Tabung Legasi Komuniti Tunku (Tunku Community Legacy Fund), hasil sumbangan awal berjumlah RM1 juta daripada seorang rakyat Malaysia yang memilih untuk tidak dikenali. Penderma tersebut, yang dilahirkan pada era 1940-an dan dibesarkan oleh seorang ibu tunggal di Pahang, pernah melalui pelbagai kesukaran hidup termasuk tidur di lantai kedai dan berkongsi bilik sepanjang tempoh pengajiannya.

Berkat sokongan masyarakat, beliau berjaya menamatkan pengajian di Universiti Malaya sebelum berkhidmat sebagai penjawat awam. Tidak pernah melupakan jasa semua pihak yang membantunya, beliau telah mewasiatkan sumbangan bernilai RM1 juta kepada YTAR sebelum meninggal dunia, bagi menyokong generasi muda yang berpotensi tetapi berdepan kekangan kewangan untuk meneruskan pengajian.

Dana ini membolehkan YTAR menganugerahkan tujuh biasiswa pada tahun 2025. Setiap penerima datang daripada latar belakang berbeza tetapi berkongsi aspirasi sama untuk membina masa depan lebih cerah buat diri, keluarga dan negara. Antaranya adalah Muhammad Ariff Shuqran Bin Ismail, anak muda dari Perlis yang pernah menanggungkan pengajian sehingga enam tahun sebelum kembali ke universiti dan kini mengikuti pengajian di UM; serta Chew Cai San, pelajar Orang Asli yang melanjutkan pengajian dalam bidang Perguruan dengan Bimbingan dan Kaunseling di IPG Tengku Ampuan Afzan.

YB Datuk Aaron Ago Dagang, Menteri Perpaduan Negara berkata semangat memberi dan budaya saling menyokong telah sekian lama menjadi asas kekuatan rakyat Malaysia. Penubuhan tabung ini juga bertepatan dengan genap 35 tahun pemergian Almarhum Tunku Abdul Rahman, sekaligus menjadi penghormatan bermakna terhadap legasi beliau sebagai Bapa Kemerdekaan yang sentiasa menjiwai semangat memberi dan kepedulian terhadap rakyat.

Pengerusi YTAR, Datin Sri Sharifah Menyalara Hussein, yang juga cucu kepada Almarhum Tunku Abdul Rahman, berkata “Sumbangan ini mengingatkan saya kepada semangat memberi arwah datuk saya, yang terkenal dengan kemurahan hati sepanjang hayatnya. Legasi penderma ini akan terus hidup melalui tujuh penerima pertama dana ini, sekaligus memberi impak yang melangkaui komuniti mereka.”

Kementerian Perpaduan Negara menggalakkan lebih ramai rakyat untuk mempertimbangkan pemberian legasi demi memastikan lebih ramai anak muda berpotensi dapat meneruskan pengajian tanpa halangan kewangan. Sumbangan kepada Tabung Legasi Komuniti Tunku dibuka sepanjang tahun. Untuk maklumat lanjut atau perbincangan berhubung pemberian legasi, sila hubungi contactus@yayasantar.org.my.

Kementerian Perpaduan Negara

8 Disember 2025

KPN.100-9/1/1 (**103**)